


ALAHADY FAHA 29 MANDAVANTAONA - A



NY ANDRIAMANITSIKA: MIZANA BE TSY MIANGATRA

Ry Kristianina havana, amin'ity fiainana ADY sady DIA ity dia tsy maintsy misy safidy ataontsika raha tsy izany dia rendrika isika, revo tanteraka ao anatin'izany Ady izany ary tsy ho tody amin'ny tiantsika aleha dia ny fiainana mandrakizay. Izany no azo amintinana ny hafatry ny Eglizy amin'izao Alahady faha 29 mandavantaona izao. Ny vakiteny voalohany ao amin'ny bokin'Izaia mpaminany dia mananatra antsika tokoa amin'izao fiainana sarotra diavintsika izao : raha tsiahivina io vakiteny io

dia manambara fa mbola tany an-tsesitany ny vahoaka Israely ka niatrika zavatra manahirana sy sarotra, fantantsika fa raha atao hoe sesitany dia midika fa lavitra ny tany fiaviana sy ny fiainana mahazatra ka maro ny zavatra tsy maintsy etrehina sy manahirana.

Mampatsiahy antsika amin'izao vanim-potoana iainantsika izao, toa very fanahy mbola velona isika. Tamin'izany indrindra

no nambaran'Andriamanitra fa hanangona sy hanorina indray an'i Jerosalema vaovao sy ny Tempoly izy ary fitaovana nentiny nantanterahana izany i Sirosy mpanjakan'ny Persa. Azo lazaina izany fa faminiana io ary ao aminy no vahoaka famonjena tamin'izay. Ao amin'i Jesoa no tanteraka manontolo io faminiana io satria Izy no famonjena manfaka antsika amin'izay fototra rehetra manjo antsika i Sirosy dia fitaovana tamin'izay, ka isika koa amin'izao vanim-potoantsika izao araka

Vakiteny I : Iz. 45, 1. 4-6
Tononkira : Salamo 95
Vakiteny II : 1 Tes. 1, 1-5b
Evanjely : Mt. Mt. 22, 15-21

ny averimberintsika dia mila vavolombelona , mila mpitarika ny olona izao satria efa tsy misy "répère" intsony tahaka an'ireo olona voan'ny sesitany tamin'izay, very ny soatoavina.

Isika vita batemy no Kristy mpiara-belona ain'ny olona amin'izao andro iainantsika izao ka anjarantsika ary no mitondra ny fanantenana, mitondra ny fitiavana, mitondra ny finoana eo anivon'ny mpiara-belona amintsika. Izany indrindra no ilaina safidy mazava tsara.

Ao amin'ny Evanjely milaza ireo Farisianina sy Herodiana izay nitady hamandrika sy hamitapitaka an'i Jesoa : izay ihany koa no mianjady amintsika, izay ny làlam-piainantsika, izay koa no anjarantsika raha mijoro ho Kristy Mpiara-belona amin'ny olona isika. Matetika rehefa mijoro ho vavolombelona isika eo amin'ny fiainantsika andavanandro dia tsy maintsy misafidy. Fantantsika tsara ny nahazo an'i Lucien Botovasoa izay modely sady mpivavaka ho antsika, izy ihany koa dia nasaina nisafidy tahaka an'i Jesoa izay voasoratra amin'ny Evanjely androany raha nitady hamandrika azy ireo farisianina. I Jesoa mahalala ny faharatsian'izy ireo mpihatsaravelatsihy ireo ary nolazainy mazava : *“Ry mpihatsaravelatsihy, nahoana ianareo no maka fanahy Ahy? Asehoy ahy ny farantsa kely fandoa amin'ny hetra . Dia nanasehoany denie iray Izy. Ary hoy i Jesoa taminy: “Sarin’iza, sy anaran’iza ity?” Hoy ireo hoe: “An’i Sezara”. Ka hoy Izy: “Raha izany àry, dia aloavy ho an’i Sezara izay an’i Sezara, ary ho an’Andriamanitra izay an’Andriamanitra”.”.*

Izany indrindra ry Kristianina havana, tian'i Jesoa ho tsapan'ireo mpanadihady sy tsapantsika tokoa ny safidy tsy maintsy atao. Tsy tian' i Jesoa ny manao fampianarana lava fa ireo manadihady azy no tiany mamaly ny valim-panontaniana apetrak'izy ireo. Tsy iza moa i Sezara voalaza io fa izy no endrik'izao tontolo izao.

Ry Kristianina havana ny fototry ny fampianarana amin'izao Alahady faha 29 mandavantaona izao dia ny fanontaniana hoe : iza no fidintsika, iza no manentana ny fiainantsika, ary hevitr'iza no arahintsika eo amin'ny fiainantsika andavanandro, ny hevitr'izao tontolo izao ve sa Andriamanitra ? Dia ambaran'i Jesoa amin'io hevitra sy amin'ny fampianarana io ny tiany ambara amin'ny hoe iza no arahintsika eo amin'ny fiainantsika andavanandro. Iza no tompointsika satria izay tompoina no andoavana “hetra”

Fantantsika ny ambarany hoe : "Ataovy an'i Sezara izay an'i Sezara" izany hoe fanatanterahana ny hevitr'izao tontolo izao izany hoe ny fitiavan-tena, ny fanangonan-karena, tsy misy fahafoizana fa fanilikilika ny hafa, izay no mahatonga ny fanapotehana eo amin'ny fiaraha-monina satria mihevtira ny tena fotsiny fa tsy mitsinjo ny hafa noho ny hetraketraka , izay ny hevity ny hoe “an’i Sezara”, fanapotehana noho ny fialonana sy ny fitiavan-tena ary ny avonavona. Izany indrindra no tsy maintsy hahazantsika misafidy mazava raha tiantsika ho taranaka manorina, génération mpanorina isika hoy isika fa tsy mpanapotika.

Aoka ho an'Andriamanitra ny fiainantsika izany hoe hampanjaka ny marina. Ao amin'ny vakiteny voalohany milaza fa fitaovana isika hampanjaka ny marina. Ny manapotika ny fiainantsika amin'izao tontolo izao dia noho ny tsy fisian'ny fahamarinana intsony fa fampanjakana ny hevity ny tena, ary hita fa normaly izany ho an'ny maro. Nantintraterintsika tamin'ny fankalazana ny JMJ teto amin'ny diosezy fa ny Fanahy no maha olona : "Ssambatra ny malemy fanahy fa handova ny tany izy". Matoa ny tany izny hoe ny tranobe iombonantsika ity izay manomboka amin'ny fianakaviana, ny

eglizy kely, ny fiaraha monina, io tranobe io potika satria ny hevitr'i Sezara, ny hevitr'izao tontolo izao no hampanjakaintsika.

Aoka hihavao isika ary hanorina ny Eglizy tokoa isika, fanorenanana ny Eglizy Olona ao anatin'ny fahamarinana, fifankatiavana no tanterahintsika isan'andro dia ho feno fanantenana isika, izany no ambaran'ny loko maintso abaribarintsika amin'ny alalany ireo "tenue" isannkarazany eto amintsika, ho sekoly maintso sy ho diosezy maintso isika.

Ampianaran'i Md Paoly amintsika amin'ny vakiteny faharoa, raha io fanentana io no banjinintsika dia aoka iara-mitalaho ny fahasoavan'Andriamanitra Nitalaho ho azy ireo I Md Paoly" *ho aminareo anie ny fahasoavana amam-piadanana*"

Ilay fiarahabana apostolika dia manambara ny fahafahantsika miombona hatrany amin'Andriamanitra mba hanjaka eo anivontsika ny fiadanana sy ny fifankatiavana. Nasongadin'i Md Paoly amin'ny fomba fiteniny tsy mba mizahozaho izy fa miara misaotra an'Andriamanitra.

Izany koa ny amaranantsika fandalinam-pinoana ataontsika izao ka hahatonga antsika ho Kristy mpiara belona amin'olona, ny fahaizantsika koa misaotra an'Andriamanitra eo amin'ny zava-misy iainantsika andavanandro. Mahaiza misaotra an'Andriamanitra isika satria avy aminy ny loharano ny soa rehetra eo anivontsika.

Matetika adinontsika izany satria ny hevitr'izao tontolo izao no manjaka ka tsy mahatsiaro mivavaka intsony isika. Izany no ampianarin'i Masina Maria antsika amin'izao volana oktobra volan'ny raozery izao mba hahay hibanjina sy hisaotra an'Andriamanitra isika eo amin'ny fiainantsika andavanandro. Aza manadino ny essential isika izany hoe ny mahaizy azy ny fiainana dia ny fiombonana amin'Andriamanitra izay no dikan'ny Rozery ibanjinantsika miaraka amin'i Masina Maria ireo misterim-pamonjena rehetra.

Ry Jesoa Tompo ô, mifanjevo sy misavoritaka ny zavamisy eo amin'ny fiainanay andavanandro, ny fahefana ara-nofa no matetika manjakazaka eo aminay ka very fanahy mbola velona izahay. Mitalaho aminao izahay, ampio hahatoky ny fahendrena atolotrao ka handray izany, mba hahay hiara hiaina izahay. Entinay ambavaka ireo mpitondra anay mba ho fanahy maha olona tokoa no entiny manatanteraka ny adidiny sy hikatsaka ny soa iombonana mba hahafahany vahoaka hiaina ao amin'ny fiadanan'i Kristy.

Ry Jeso Tompo ô, hainao ny nanazava tamin'ireo izay mitady mamitapitaka anao, ampianaro izahay eo amin'ny fiainana andavanandro hahay hijoro ho tena vavolombelonao ary ho Kristy mpiara-belona amin'olona tokoa izahay ka afaka mitondra ny tena fahamarinana, ny tena fifankatiavana, hahay hampitraotra ny finoana sy fiainana andavanandro izahay ka hitondra izay tena fihavanana marina, ho hainay tokoa ny manavaka izay ho entinay hanompoana anao sy hikatsahana ny soa iombonana ao amin'ny fiadananao. Amen